

CAMPAÑA POR UN CONSUMO RACIONAL

A campaña organizada pola Federación Ecoloxista Galega (FEG) supuxo a edición dun tríptico informativo sobre as opcións de compra que xeneran menos lixo, baseadas no uso



de envases retornáveis, en levar a bolsa da casa (de tea), en evitar os envoltorios excesivos e os materiais tóxicos (PVC, bandexas de corcho sintético), así como na preferéncia polos produtos frescos e do país.

Este tríptico vai acompañado dunha tarxeta postal para remitir aos centros comerciais solicitando-lles a sustitución dos materiais perigosos polos mais ecológicos e a sua colaboración na redución, reutilización e reciclaxe do lixo.

Asimemso, a FEG sacou unha bolsa de tea para a compra co lema da campaña. Unha campaña, por tanto, na que podes participar. Tarxetas e bolsas (bolsa a 500 ptas/unidade) podes adquiri-las a calquera dos grupos membros da FEG, ou nos locais desta e de ADEGA en Compostela. Neste momento acha-se en preparación un cartel sobre o mesmo tema, e no que se espera que colaboren diversas organizacións e colectivos.

CONTACTO: FEG (Federación Ecoloxista Galega), Apdo. 949, 15080-Compostela. Tlf./Fax: (981) 575444
Exposición fotográfica itinerante:

O IMPACTO DOS ENCOROS NA GALIZA

Da man da obra fotográfica de Tino Martínez, Xacobe Meléndrez Fassbender, Xosé Varela Vilariño e MARGEN Fotografía, o colectivo ecoloxista CEMPÉS oferta este material dirixido aos centros de ensino, concellos e outras institucións e asociacións co obxectivo de promover a reflexión sobre o uso que a nosa sociedade fai da enerxía e as suas consecuencias sobre o meio natural e social, abrir o debate sobre a suposta necesidade de novos encoros na Galiza e para fornecer o desenvolvemento de asociacións con sensibilidade ambiental e, ao mesmo tempo, sensibilizar ás distintas institucións.

A exposición abrange, entre outros, os seguintes contidos: A produción enerxética e a degradación da terra, o Meio Galego ameazado pola construcción de novos encoros, as enerxías renovábeis e o impacto dos encoros sobre o ciclo da auga, a flora e a fauna, a paisaxe e o patrimonio. Ademais analisa os tres macroproyectos do Sela, Navia e Caldas. Ao material fotográfico engaden-se unha serie de textos breves que requieren unha mínima capacidade de

comprensión que se sitúa arredor dos 15 anos.

As organizacións e institucións interesadas en levar a exposición poden receber máis información ou solicitar a mesma dirixindo-se ao teléfono 981.655055 (Xacobe) ou a:

CEMPÉS-Asociación Ecoloxista,
Apto.2.158 - 15080 A Coruña.

DENÚNCIA DO CONTURBÉNIO XUNTA-FENOSA

A Asociación para a Defensa Ecolólica de Galiza (ADEGA) ven de editar unha tarxeta postal na que se recollen tres imaxes da Galiza real, todas elas relacionadas co grave problema ambiental da enerxía e da empresa que a monopoliza, FENOSA. As tres imaxes son: A Central Térmica de Meirama (chúvia ácida), un encoro (FENOSA participa en varios macroproyectos novos: Sela, Úmia...), liñas de alta tensión (contaminación electromagnética). Unha imaxe especular da central térmica de Meirama serve para denunciar o novo proxecto de central térmica INCINERADORA que SOGAMA (Xunta-FENOSA) queren instalar en Cerceda. A nova central clónica, feita a imaxen e semellanza de FENOSA, non só emitirá chúvia ácida, senón tamén metais pesados, dioxinas, furanos, etc. A tarxeta vai dirixida ao presidente da Xunta, ao que se lle fai saber que os galegos e galegas desexamos viver nun país saudável, non hipotecado por empresas como FENOSA.

CONTACTO: ADEGA, Rua de Touro 21-2º
15704-Compostela (Tlf./Fax. 981-570099)

EN DEFENSA DO FERROCARRIL

A Mesa pola Defensa dos Camiños de Ferro continua coas suas actividades de reivindicación de financiamento para o Plano de mellora aprobado polo Parlamento Galego. Teñense realizado asembleas nas localidades más afectadas polo desmantelamento progresivo, e incorporado algunas institucións a esta demanda. Nestes momentos está-se na fase de centralización das sinaturas recollidas, para remiti-las ao goberno central. ADEGA ten entregado á Mesa perto de duas mill sinaturas.

Por outro lado, Renfe anunciou aos catro ventos a entrada en servizo para setembro do novo tren que reducirá lixeiramente o tempo dos percursos na liña Coruña-Vigo. Fican algúns dous sobre os avances que significa esta novedade: vanse incrementar os prezos, convertendo-o nun tren de executivos?, parará en localidades como Vilagarcía e outras onde hoxe o fan os rexionais express?, permitirá incrementar a frecuencia dos servicios, ou sustituirá algún dos existentes?. Todo indica que sen unha mellora substancial nas vias, calquera modernidade deste tipo servirá de pouco.

